

Awor si cos a para bira vies:

SINDICATONAN TA NA TURNO DEN E GUERA CONTRA GLENBERT CROES

ORANJESTAD(AAN) Ta kico mas pueblo di Aruba por spera di e persecucion fanatico cu tin contra Glenbert Croes pasobra pueblo ta haya su mes tur siman confronta cu un otro grupo o instancia tras di otro cu kier persigui e politico Glenbert Croes.

Ya mas cu 30 miyon florin a ser malgasta den tur sorto di investigacion cu a worde haci contra Glenbert y despues di e carta di PG y e reunion den parlamento caminda partido MEP a bandona sala pa no vota pa e mocion pa stipula reglanan y leynan pa hura-mentacion di ministronan y parlamentarionan, awor ta turno na sindicatonan pa sigui cu e persecucion contra Glenbert Croes.

Segun informacionnan cu DIARIO a haya, awe durante dia sindicatonan na Aruba aparentemente ta bay anuncia cu nan ta contra cu Glenbert Croes ta bira o keda como parlamentario y cu nan lo bin cu pruebanan pa muestra cu e ministro encuestion a viola ley etc etc!!

Ministerio Publico tin investigacionnan andando caba contra Glenbert Croes y ora cu yega e momento final pa bay corte, Glenbert Croes mester bay duna cuenta dilanti di mesa berde y pa tal Glenbert a laga sa na mas cu cien ocasion caba cu e no tin problema cu esey y si Glenbert a viola ley e mester paga pa esey.

Si sindicatonan tin pruebanan contra Glenbert Croes anto nan mester entrega esaki na Ministerio Publico y no bay trata awor di sinta riba stoel di PG.

Glenbert Croes no ta bira ministro mas y asina AVP, MEP y Hulanda a haya nan gana, mientras cu Ministerio Publico ta sigui cu nan caso penal contra Glenbert, awor ta turno na sindicatonan na Aruba pa tira e ultimo golpi pa remata Glenbert Croes prome cu su caso ser treci pa dilanti den Corte.

Si sindicatonan ta haya cu Glenbert Croes no por bira parlamentario pasobra el a comete un ke otro anto awe mes sindicatonan na Aruba mester pidi pa tur otro parlamentario di tanto MEP y AVP pa nan tambe ser investiga y pa no lubida otro ex parlamentarionan y ministro-

nan cu tambe a goberna Aruba desde 1986.

Na momento cu sindicatonan bay sinta riba e stoel di PG pa asina bin cu pruebanan contra Glenbert, nan mester ta honesto cu pueblo y cu nan miembronan tambe pa exige investigacion contra tur ministro y parlamentario cu den pasado tambe a pifia formalmente den nan maneho y te hasta a comete actonan penal; sea honesto y aplica ley pa un ley pa tur.

Awe sindicatonan mester bisa pueblo ta di con te awe nan no a bin cu pruebanan contra o a pidi investigacion riba ministronan y parlamentarionan cu tabata meti den Cargo Zaak, DVZ, Sporthal na Santa Cruz, Lotto pa Deporte, Caso Barco Daniel Leo, caso Kluis Arubahuis, tumamento di placa di Mafia, falsificamento di diploma, escandalo di departamento di Labor, cosnan cu a ser regala na Zwinkels, Ministro di Husticia Narco Trafico, caso Radisson Hotel, Sinbad, World Youth Festival, Kem-

perfashion, donacion di Sinbad, mencion di compania di parlamentario den indictment Mericano relaciona cu labamento di placa, autonan di 5 florin, malgastamento di placa di Arubahuis, escandalo cu medicamento, escandalo di tereno, oro di barco Vera, tapmento ilegal di telefon na Aruba, conflictonan di interes di ministronan relaciona cu companianan di famia etc etc.

Si tur e casonan menciona ser investiga y mester bin persecucion penal anto ta poco hende lo keda den gobierno y den parlamento.

Pueblo lo haya e alivio di siglo si tur hende worde investiga y ya cu sindicatonan ta papia di investiga y cu tin actonan cu a ser cometi cu no ta bon, lo ta bon pa bin investigacion tambe riba partidonan politico y mester bin screening di tur candidato prome cu nan subi lista; si ta habri mester habri e beerput anto habri esaki pa tur hende y no pa un so.

E resultado di tur e investi-

gacionnan aki por bay pone cu dos cos mester worde haci na final, cu sea ta persigui tur hende cu a pifia y asina ta keda poco di esnan actual pa goberna e pais o ta anuncia un amnestia nacional pa evita cu pais Aruba haya su mes den un era sin fin di inquisicion

estilo Middeleeuwen y Beeldenstorm pa no lubida e guerra perdi di Don Quichote.

Falta awor pa asociacion di eclips solar tambe cuminsa un bataya contra Glenbert pa e no bira ministro o parlamentario pa asina completa e circulo.